
ՀԻՆԱՅԱԴՐՄԱՆ ԱՐԱՐՈՂՈՒԹՅԱՆ ԽՈՐՀՈՒՐԴԸ
ՀԱՅՈՑ ՀԱՐՄԱՆԵԿԱՆ ԾԻՍԱԿԱՐԳՈՒՄ

ՆԱՐԻՆԵ ՇԱՄԱՄՅԱՆ

Հարսանեկան ծիսական համակարգում հինայելու արարողությունը շատ կոնկրետ է՝ գրեթե բոլոր ազգագավառներում ընկնում է ուրբաթ օրվա գիշերը: Հինայադրման ողջ ընթացքը ուղեկցվում էր հանդիսավոր տեսարաններով, որոնց անբաժանելի մասն էին կազմում երթերը, պարերը, երգերը: Հինայադրման արարողությունը, հատկապես հինայի գիշերը կազմակերպվող հանդիսավոր արարողություններում՝ փեսայի տանից դեպի հարսնացուի տուն, մեծամասնությամբ կատարվում էր կանանց ուժերով: Հատկապես մեծ դերակատարություն ուներ հինա դնող հմուտ վարպետը: Վերջինս հիմնականում լինում էր գյուղի ճանաչված, հմայությամբ զբաղվող փորձառու պառավ կինը կամ փեսայի մոր լիազորությունը ստացած կինը: Այդ կնոջ կերպարում կարող էր հանդես գալ քավորկինը, մեծ հարսներից որևէ մեկը: Իսկ տղամարդկանց հավաքություն ստանձնում էր քավորը, ազապաշին, գյուղի ավագներից որևէ մեկը, ում դարձյալ ընտրում էին նախօրոք:

Հինադրեքի ծեսում պարերի կենտրոնական դերակատարը դարձյալ հինա դնող կինն էր: Գողթնում հարսնացուի տանը ընթրիքից հետո սանամայրը, հինայի ափսեն գլխին դրած, պարում էր, իսկ հրավիրյալները դրամներ էին գցում հինայի ափսեի մեջ: Այնուհետև նրան հետևում էին հարսներն ու աղջիկները: Մանամայրը վերցնում էր իրեն նվիրված դրամները և հինան շաղախում: Շաղախելուց հետո հինա էր դնում հարսի ձեռքերն ու ոտքերը, ապա՝ մյուս աղջիկների միայն ձեռքերը¹: Վասպուրականում² փեսայի քրոջ կամ փեսայի տան հարսներից մեկի գլխին դրած հինան տանում էին դաֆ ու զուռնի առաջնորդությամբ: Հինան՝ շաղախված, դրվում էր մատուցարանի վրա, որի եզրերին մոմեր էին վառվում: Հինայի ափսեի շուրջ լցված էր լինում մեծ քանակությամբ շաքար ու միրգ: Հինա բերողը, մատուցարանը գլխին դրած, պարում էր և ապա հինան հանձնում հարսնացուի մորը՝ նվեր տտանալով: Անմիջապես առաջ էին բերում հարսնացուին, գլխին երկու լավաշ հաց խաչաձև դնելով՝ օրհնում էին «Աստված շատ հաց տա» բանաձևով և հինան դնում հարսնացուի ձեռքերին: Բոլոր կանայք պարտավոր էին հինա դնել իրենց ձեռքերը՝ բացի սզավորներից: Բուրվարի գավառում հարսի ձեռքերը հինա դնելուց առաջ թույլտվություն էր խնդրվում հարսի ծնողներից՝ «Բարեկամներ, իրավունք տվեք խինա» որից հետո ազապաշին հարսնացուին

¹ Ե. Լ. Կալայան. «Ազգագրական հանդես» (այսուհետ՝ ԱՀ), հ. XII, Թիֆլիս, 1905, էջ 126:

² Ե. Լ. Կալայան. Վան-Տոսպ - Հայոց Ձոր. - ԱՀ, հ. XX, Թիֆլիս, 1910, էջ 150-151:

դրամական պարզն էր տալիս՝ «խինարանդու»։ Եթե հարսնացուին դրամ չտային, նա ավերը չէր բացի հինայելու համար։ Այնուհետև հարսնացուի քույրը կամ հարսներից մեկը, շաղախած հինան մաղի մեջ դրած և մաղի եզրագծով մոմեր վառած, դրանք գլխին դրած՝ պարելով մոտենում էր հարսին։ Հարսի աջ ձեռքը հինայում էր նրա ազգական կանանցից մեկը, իսկ ձախը՝ փեսայի կին ազգականներից մեկը³։

Վայոց Ձորում ազապբաշին երաժիշտների առաջնորդությամբ այցելում էր քավորին⁴։ Քավորի տանը բերվում էր հինան՝ քավորակնոջ գլխին դրած սկուտեղի մեջ։ Քավորակները հինան խաղացնում էր (գլխին դրած պարում էր), հետո դնում էր քահանայի, ավագների առջև, ովքեր օրհնում էին հինան, բարեմաղթելով՝ «Աստված շնորհավոր անե»։ Օրհնությունից հետո թույլատրվում էր ճկույթները թաթախել հինայի մեջ և դրամական նվեր դնել սկուտեղի մեջ, որը պարեցնող կնոջ բաժինն էր։

Բայագետում հինա խաղացնելու, պարելու արարողությունը տեղի էր ունենում փեսայի թուրը վաճառելուց անմիջապես հետո⁵։ Այստեղ հինան պարեցնում էր նորահարսներից մեկը։ Պարը, ըստ երևույթին, բավական բարդ պար էր, քանի որ սկուտեղը գլխավերևում էր դրվում, և պարողը հնարավորություն չունեւր այն ձեռքերով բռնելու, քանի որ երկու ձեռքերն էլ զբաղված էին։ Մի ձեռքին բռնում էր վառվող մեղրամոմը, մյուսին՝ թաշկինակը և պարում էր՝ հինան խաղացնում, իսկ նրա շուրջ՝ կլոր շրջան կազմած, պարում էին երիտասարդ հարսներն ու աղջիկները։ Դերսիմում հինան պարեցնում էին գիշերը, տան կտուրիմ⁶։ Մեծ ափսեի մեջ դնում էին հինան, իսկ ափսեի եզրերով՝ վառում մոմեր։ Պարողը աջ ձեռքով բարձր պահում էր հինայի ափսեն և պարը կատարում էր պարաշրջանի կենտրոնում։ Այնուհետև ափսեն փոխանցում էր մեկ ուրիշի՝ մտնելով պարաշրջան։ Պարողները միայն երիտասարդ աղջիկներ և հարսներ էին։

Հինադրեքի ծեսում կատարվող պարերը դանդաղ էին, ունեին հանդիսավոր բնույթ։ Պարաքայլերը հիմնականում լինում էին՝

Երկու քայլ աջ, երկու քայլ ձախ,
Երկու քայլ աջ, մեկ քայլ ձախ,
Օձաձև կամ սյուզմա տալով⁷։

Կատարվող մենապարերը (թաք պարերը) կատարողներից պահանջում էին մեծ վարպետություն։ Պարի մեջ հարկավոր էր պահել հավասարակշռությունը, քանի որ գլխավերևում՝ առանց ձեռքերի միջամտության, պետք է պահվեր սկուտեղը և որպեսզի այն չընկներ կամ, առավել նս, չհանգչեին վառվող մեղրամոմերը, հարկավոր էր պարել առավել դանդաղ։ Պարելու ընթացքում մոմերի հանգչելը համարվում էր վտանգավոր,

³ Ա. Շ ա հ բ ա գ յ ա ն. Նշխարներ Բուրվարի գավառի պատմության և ազգագրության, Թեհրան, 2003, էջ 165–168։

⁴ Ե. Լ ա լ ա յ ա ն. Վայոց Ձոր.– ԱՀ, հ. XIII, Թիֆլիս, 1906, էջ 155։

⁵ Ե. Լ ա լ ա յ ա ն. Բայագետ.– ԱՀ, հ. XVI, Թիֆլիս, 1907, էջ 21–22։

⁶ Շ. Մ ն ձ ու ը ի. Երկեր, Երևան, 1986, էջ 318։

⁷ Դաշտային ազգագրական նյութ (այսուհետև՝ ԴԱՆ), 2010, Արտաշատի շրջան, գյուղ Այգեստան, ասացող՝ Օֆիկ Սահակյան, ծնվ. 1928 թ.։

չարագուշակ ամուսնացող գույզի համար⁸: Այդ իսկ պատճառով՝ թաք պարը կատարվել է պարաշրջանի կենտրոնում՝ չարքերից, արտաքին աշխարհի վնասատու ուժերից զերծ պահելու համար: Դա է նաև հիմնական պատճառներից մեկը, որ սկեսուրը հատուկ էր ընտրում հինայի արարողության գլխավոր անձին, քանի որ լիազորված անդամը ոչ միայն ղեկավարելու էր արարողությունը, այլև պատասխանատու էր թաք պար կատարելու մեջ, որը բավականին բարդ է իր կատարողական ձևով: Բացի այդ, կատարվող պարը նաև վարպետության ցուցադրություն էր. որքան ճշգրիտ, հմուտ կատարվեր պարը, այնքան ազդեցիկ կլինեին հմայությունը:

Հինայադրման արարողության մեջ պարի կատարման ձևերն ունեն իրենց առանձնահատկությունները, որոնք պայմանավորված են տարածաշրջանով: Հին Ջուղայում քավորակիներ կամ փեսայի քույրը, կանաչ-կարմիր կոսպանտը ձեռքին պարելով, մոտենում էին փեսային և ժապավենները մտցնում տաբատի գոտու մեջ՝ առանց քարկապ գցելու: Ապա, ափսեով շաղախած հինան պարեցնելով, մոտեցնում էին փեսային: Վերջինս աջ ձեռքի ճկույթ մատը թաթախում էր հինայի զանգվածի մեջ: Փեսայից հետո իրենց մատերը հինայում էին քավորը, խաչեղբայրը, ազապները՝ դրամական նվերներ դնելով հինայի սկուտեղի վրա⁹: Ղազախում փեսայի քույրը, պարելով, մետաքսե ժապավենը օղի մեջ ծածանելով, ծանրաքայլ մոտենում էր եղբորը և այն ամրացնում աջ ուսից դեպի ձախ թևատակին¹⁰: Բուրվարի գավառում փեսայի քույրն էր հինայում և պարեցնելով կապում կանաչ կոսպանտը¹¹: Նշված շրջաններում հինայելու գործողությունը զուգորդվում էր կոզբանտ կապելու արարողության հետ: Պարելու տեմպը դանդաղ էր և, ըստ երևույթին, բաղկացած էր ծանր պարաքայլերից:

Հինան տանողների երթը կազմվում էր կանանց խմբի ղեկավարի ազդանշանով, ինչը և հրահանգ էր երաժիշտներին՝ հնչեցնել երթի եղանակը: Վայոց Ձորում քավորակնոջ գլխին դրած հինան տանում էին հարսնացուի տուն, որտեղ նույնպես պարեցնում էին, նվերներ հավաքում և հարսի ձեռքերը հինա դնում¹²:

Ազուլխում երթի մասնակից էին լինում միայն ընտրված անձինք: Նախքան հարսնացուի տուն գնալը, ազապները նուրով կամ խնձորով գնում էին քավորի տուն՝ վերջինիս և քավորակնոջը հրավիրելու հինադրեքի արարողությանը: Քավորակիներ իր հետ վերցնում էր անհրաժեշտ պարագաները, որոնք հարկավոր էին գոհարերվող խոյին զարդարելու համար. շաքար, կանաչ-կարմիր մետաքսե ժապավեններ, ինչպես նաև հինան՝ մեծ սկուտեղի մեջ դրված: Հինան հարկավոր էր ոչ միայն հարսի ձեռքերը հինայելու, այլև խոյի ողջ մարմինը խորհրդանշական խաչաձև պատկերներով զարդանախշելու համար: Երիտասարդ

⁸ Գ. Գ ա բ ի կ յ ա ն. Բառագիրք սեբաստահայ գավառակեզվի, Երուսաղեմ, 1952, էջ 341:

⁹ Ք ա ջ բ է ր ու ն ի. Հայկական ծեսեր և սովորություններ. - ԱՀ, հ. VII-VIII, Թիֆլիս, 1901, էջ 161:

¹⁰ Նույն տեղում:

¹¹ Ա. Շ ա հ բ ա գ յ ա ն. նշվ. աշխ., էջ 165-168:

¹² Ե. Լ ա լ ա յ ա ն. Վայոց Ձոր, էջ 155:

տղաները կանաչ-կարմիր ժապավեններ էին կապում խոյի պարանոցին, եղջյուրները զարդարում էին վառվող մեղրամուներով: Ջարդարված խոյի հետ միասին՝ նրանք հանդիսավոր շրջերթ էին կատարում՝ ի տես հանդիսականների: Ավարտելով իրենց ցուցադրությունը և պարերը՝ հինալադրող կնոջ և երաժիշտների առաջնորդությամբ երթը նույն հանդիսավորությամբ ուղևորվում էր հարսնացուի տուն¹³:

Գողթնի մյուս գյուղերում նույնպես կատարվում էր նմանատիպ շրջերթ՝ նախքան հարսնացուի տուն գնալը: Հինայի սկուտեղում հիմնականում դնում էին մրգեր և գաթաներ, իսկ սկուտեղի կենտրոնում՝ նուռ, վրան վառվող մեղրամուս: Պարտադիր չորս մեղրամուս էին վառում սկուտեղի շուրջը: Մանամայրը՝ երթի առաջնորդը, մի քանի հոգու հետ միասին, թոյլաշու (ազապբաշու) առաջնորդությամբ, գնում էին հարսնացուի տուն¹⁴: Կան ազգագրականներ, որտեղ երթում հինա տանողը քավորն է: Հայոց Ձորում երթի առաջնորդը քավորն էր, որտեղ ամբողջ ճանապահն անցնում էին պարելով և հինայի սկուտեղը խաղացնելով¹⁵: Ջավախքում նույնպես երթն ուղեկցվում էր քավորի առաջնորդությամբ¹⁶:

Քեսապում արարողությունը կատարվում էր ուրբաթ գիշերը: Այն տեղի էր ունենում մեծահասակների հավաքատեղիում՝ օտայում¹⁷, որտեղ հանդիսականները հիմնականում ավագներն և ազապներն էին, որոնք նստում էին ըստ տարիքի՝ կենտրոնական տեղը հատկացնելով փեսա-թագավորին և խաչեղբորը: Խնջույքի ընթացքում հարսանիքի կազմակերպիչը՝ եիկիտպաշին (ազապբաշին), պղնձե խոր ափսեով բերում էր հինան: Արարողապետի՝ հինա շաղախելու պահը ուղեկցվում էր հանդիսականների երգով, որը կատարվում էր փոխնեփոխ: Երգը կոչվում էր՝ «Հինա պատրաստել»: Երգի առաջին տունն անպայման կատարվում էր արարողապետի կողմից: Երգի ավարտից հետո հինայի պղնձե ափսեն մոտեցվում էր փեսային և բարձրաձայն հայտարարվում.

Ըսպիտուօկ մուրեօք
Միվ մուրեօք
Հուօրս, փիսու
Մինձ, պրգտէկ
Հերէօստ, ախբուօտ
Իշգէն, տրդու
Ըմմընիէն իզնուօն
Պիտէծուօն
Հինի մ մը...

Ճերմակ մորուք
Սև մորուք
հարս ու փեսա
մեծ ու փոքր
հարուստ, աղքատ
տղա, աղջիկ
հրամանով
Հաճությամբ
Հինայե մ...

¹³ Ք ա ջ բ եր ու ն ի. նշվ. աշխ., էջ 158:

¹⁴ Ե. Լ. ա լ ա յ ա ն. Գողթն, էջ 126:

¹⁵ С р б. Л и с и ц и а н. Армянские старинные пляски. Ереван, 1983, с. 180–181.

¹⁶ Ե. Լ. ա լ ա յ ա ն. Ջավախք.– ԱՀ, հ. Լ, Շուշի, 1895, էջ 251:

¹⁷ Հ. Չ ո լ ա ք յ ա ն. Քեսապ, հ. II, Հալեպ, 1998, էջ 37–38:

Բոլոր երիտասարդները բացականչում էին միաբերան՝ «Հօվը, հօվը» (այո, այո), իսկ մեծահասակները հավանություն էին տալիս, որից հետո արդեն կարելի էր հինայել:

Հինայելու արարողությունը Մուսա լեռում կատարվում էր փեսայի տանը, որին ներկա էին գտնվում ավագների խորհուրդը և երիտասարդները՝ ազապները¹⁸: Այստեղ հինայելու պարտականությունը ստանձնում էր ազապբաշին: Վերջինս, նվեր ստանալով տղայի ծնողներից, կատարում էր արարողակարգը: Այն հետևյալն էր.

քավորը դիմում էր բոլոր մասնակիցներին.

Բօյուք, քուչուկ

Ադ, սախդարա սախկալ

Ադալարն իզնիլէ, Բյահյալիբեն իզնիլէ

Ջումլէ ուրան յիկիտլիբէն գօնուլէ

կամ-

Նշանյըլը դնայը՞մ մը...
յէ նք...

Մեծ ու փոքր

Ճերմակ ու սև մորուքավոր

Աղաների ու քյոհվեների հրամանով

նստած երիտասարդների

քով

Նշանված տղային հինա-

Այդ պահին լսվում էին բացականչություններ, անգամ հրացանաձգություններ՝ ի նշան համաձայնության: Առաջինը փեսայի մատն էին հինայում, այնուհետև քավորի, ազապբաշու, ազապների:

Նկատենք, որ բնագրերում պարզորոշ նկարագրվում է մեծահասակների դերն ու կշիռը հասարակության, համայնքի մեջ: Նրանց պատասխանից էր կախված նշանված տղային հինայելու թույլտվություն տալը, քանի որ այդ պահից սկսած փոխվելու էր տղայի կարգավիճակը թե՛ ընտանեկան, թե՛ հասարակական կյանքում: Դա դիտվում էր որպես նախապատրաստություն, անցումային փուլ ամուսնացող տղայի կյանքում:

Արտաշատի շրջանում արարողությունը մեծ շուքով էին կատարում թե՛ փեսայի, թե՛ հարսի տանը՝ քավորակնոջ կողմից կամ եթե գյուղում կար լավ հինա դնող կին՝ նրան էին հրավիրում¹⁹: Փեսան, ազապները հավաքվում էին փեսայի տանը, հարսի ընկերուհիները՝ հարսի տանը: Ըստ ժողովրդական բացատրության՝ հինայի արարողության նպատակը նորաստեղծ ընտանիքի ամրությանը, կայունությանը նպաստելն էր: Այրիացած կնոջն արգելվում էր արարողությանը մասնակից լինել. նա կարող էր միայն դիտել՝ մի անկյունում նստած²⁰:

Տարեց կնոջ կողմից հինա դնելու գուգահեռը հանդիպում ենք նաև Մուսա լեռում, որտեղ հարսնացուին և երիտասարդ աղջիկներին հինա բաժանողը հասակավոր կին էր²¹: Պատավ կնոջ կերպարի գործառույթն այս արարողության մեջ կարևորվում է այն հանգամանքով,

¹⁸ Գ. Գյոզալյան. Մուսա լեռան ազգագրությունը, Երևան, 2001, էջ 156–157:

¹⁹ ԴԱՆ, 2011, Արտաշատի շրջան, գյուղ Այգեստան. Օնիկ Թադևոսյանի պատմելով՝ իրենց գյուղում Կա-տինա անունով մեծ կին կար, հարսանիքների հինան նա էր դնում, միշտ նրան էին կանչում:

²⁰ ԴԱՆ, 2011, Արտաշատի շրջան, գյուղ Այգեստան, սասցող՝ Օֆիկ Մահակյան:

²¹ Գ. Գյոզալյան. նշվ. աշխ., էջ 154–155:

որ նա է բախտ, երջանկություն բաժանողը: Նրա ձեռքերում է գտնվում նոր կյանքի փուլ մտնող երիտասարդների բախտը: Բացի այդ՝ կան հմայական բազմաթիվ աղոթքներ, որտեղ հիշատակվում է «անհիշատակ պատավը»՝ որպես երջանիկ բախտի արժանացնողի.

Ասպած օդորմի բոբիկ պառվըկեն
Անիշատակ խաշին որկեն,
Յոթ դիր Հերուսադեմ ա գացեր,
Խառնած ծամին, խառնած կաժին,
Լոռ աղջկեն բախտի բանալ ա ուզեր²² / Շատախ/:

Կիլիկիայում²³ հարսի ձեռքի հինայից բերել են փեսայի տուն՝ վրան ավելացնելով նոր հինա, շաղախել և առաջինը, որպես օրենք, փեսայի, հետո քավորի, ազապբաշու և ազապների ձկնայթ մատներն են հինայել: Հինայի ափսեի չորս կողմերը վառված են եղել թվով չորս մեղրամուկեր: Հարսնացուի տանը ընթրելուց անմիջապես հետո՝ արարողությանը բնորոշ երգերով քավորակինը հինայում էր հարսի ձեռքերը: Շատ ազգագրագետներում հինայում էին ոչ միայն ձեռքերը, այլև ոտքերը, իսկ քաղաքային միջավայրում ընդունված էր հինայել հարսի գլուխը: Կիլիկիայում հարսի աջ ձեռքի միայն ավին էր հինա դրվում: Այդ մասին վկայակոչվում է հինայելու երգի տեքստում.

Հինան մերեցի, շաղախեցի,
Հինայեցեք հարսին, շնորհավոր լինի,
Աջ ձեռքդ տուր, թող հինայվի,
Հինայեցեք հարսին, շնորհավոր լինի...²⁴

Մուշ-Տարոնում հինա էին դնում հարսի ձեռքերի ափերը և եղունգները՝ բաց թողնելով ձեռքի երեսի կողմը, ապա կտորով կապում²⁵: Բալուում հինայի արարողության ընթացքում կատարվող «Բալու քաղաք շինուեր է» հինայումի երգի մի հատվածում հիշատակվում է հետևյալը.

Բալու քաղաք շինվել է,
Էրկաթե դուռ դրվել է,
Ախ, ըսի, մըտնիմ ներսը,
Եարըս մէջը կորեր է:
Աղավնի գարկին ինկավ
Թև ու թիկունք կորավ
Հեյ մալ ըսի տեսնիմ
Ինքը իրան ոտքի էլավ...²⁶

²² Մ. Հ ա ղ ո թ յ ո լ ն յ ա ն. Հայ հմայական և ժողովրդական աղոթքներ, Երևան, 2006, էջ 142:

²³ Վ. Մ վ ա գ լ յ ա ն. Կիլիկիա արևմտահայոց բանավոր ավանդությունը, Երևան, 1994, էջ 138–139:

²⁴ Նույն տեղում:

²⁵ Ե. Լ ա լ ա յ ա ն. Մուշ-Տարոն.– ԱՀ, հ. XXVI, Թիֆլիս, 1916, էջ 164:

²⁶ Պ. Ա լ ա հ ա յ տ յ ա ն. Բալուի և տարածաշրջանի երաժշտական ազգագրական հավաքածու, Կալիֆորնիա, 2009, էջ 205:

Նոր Նախիջևանում հարսնացուի սենյակի կենտրոնում կամ անկյունում նստում էին երաժիշտները և նվագում հինայելու հատուկ երգի եղանակը՝ «Ալկելին»: Հանդիսական աղջիկները, վառած կերոններ բռնած, մեկ-մեկ պարելով, խաղացնում էին հինան, այնուհետև սկսում էին հարսի գլուխը հինա դնել, իսկ վերջում աղջիկներից յուրաքանչյուրը մի-մի մատ հինա էր քսում իր ձեռքի ափին՝ որպես տարոս²⁷:

Հ. Աճառյանի արմատական բառարանի համաձայն Alcanna, alhena նշանակում է հինա²⁸, որտեղից էլ երգի անվանումը: Տվյալ երգատեքստից մեջբերենք հետևյալ քառատողը.

Հինա տրին, պաղնիք տարան,
Չիլֆի մագս փերչամ արին,
Կուլուխս ալ փոշի կապեցին,
Սիրելի քույրիկներ, տարոսը ձեզ...²⁹

Համշենահայերի և պոնտահայերի մեջ տարածված էր հարսանիքից մի օր առաջ ազգականների, մոր և ընկերուհիների հետ աղջկա բաղնիք գնալը, ուր և տեղի էր ունենում հինայադրում³⁰: Քաղաքային միջավայրում հինայումը հիմնականում կատարվում էր բաղնիքում. Նոր Նախիջևանում, Տրապիզոնում «Ալկելին» երգատեքստի մեջ հիշատակվում է բաղնիքը, որտեղ հարսի գլուխն էին հինա դրած լինում:

Հինան, ինչպես նշվում է երգերում, նաև երջանկության, ուրախության, նոր կյանքի, հաջողակ, երջանիկ բախտ բացվելու հետ է կապվում.

Աղջի հինեղ էկավ վերին կալերեն
Վար է թափել նշխուն թղթի ծալերեն
Բաղդդ լավ է գնա էնոր յետսեն
Թող դուշմանը հալի-մաշի աշելեն...³¹:

Բորչալուի գավառում հանդիպում ենք հետևյալ երգատեքստը.

Հարսնածն էկավ վերին կալերով
Խինեն բերին թղթի ծալերով
Ախպեր չունիմ, ձիու դիզկին խաղցնա
Տանի ճամբեն, բարով դարձնա³²:

²⁷ Ե. Շ ա հ ա զ ի զ. Օտեր և սովորություններ, Նոր Նախիջևան. – ԱՀ, հ. VII–VIII, էջ 84–85:

²⁸ Հ. Ա ճ ա ռ յ ա ն. Հայերեն արմատական բառարան, հ. III, Երևան, 1977, էջ 94–95:

²⁹ Ե. Շ ա հ ա զ ի զ. նշվ. աշխ., էջ 84–85:

³⁰ Բ. Թ ո ռ լ ա թ յ ա ն. Համշենահայերը ու պոնտահայերը. – ՀՀ ԳԱԱ հնագիտության և ազգագրության ինստիտուտի արխիվ, թղթ. 46/1, թ. 113:

³¹ Ա. Մ խ ի թ ա ը յ ա ն և ց. Փշրանքներ Շիրակի ամբարներից, հ. 1. – Էմինեան ազգագրական ժողովածու, Մոսկվա, Ալեքսանդրապոլ, 1901, էջ 243–244:

³² Խ. Մ ա մ ու ե լ յ ա ն. Մայրական իրավունք. – ԱՀ, հ. 19, Թիֆլիս, 1910, էջ 43:

Երգի բնույթը տխուր է: Այն կատարվում է հարսնաքույրերի կողմից՝ հարսի մազերը հյուսելու ընթացքում:

Ակնում արարողությանը մասնակցում էին ն՛ տղամարդիկ, ն՛ կանայք³³: Քավորակինը մոտենում էր հարսնացուին՝ բյուրեղապակյա ափսեի մեջ բրգաձև շաղախած հինայով, որի կենտրոնում դրված էր լինում ուղորված մոմ: Երաժշտության ուղեկցությամբ՝ հարսներն ու աղջիկները քավորին և քավորակնօրը շրջապատելով՝ երգում էին.

Աս հինան ան հինան չէ
Ղրկողն ալ ինչ աղվոր մանչ է:
Ոսկի ամանի մեջ հինաս շաղեցին,
Արծաթե սանտրով խոպոպս քակեցին...

Հինադրեքից անմիջապես հետո սկսվում էր թնկարը, որի ընթացքում պարող գույգերն այնպես էին իրար հաջորդում և փոփոխվում, որ փեսան ու հարսը անկախ իրենց կամքից հայտնվեն դեմ դիմաց:

Սասունում հարսին զարդարելիս, զգեստը հագցնելիս կանայք երգում էին.

Ձեերիկ խափեցին գուռե մե գինով,
Ձմերիկ խափեցին թոփիկ մե շիլով,
Ձաղբեր խափեցին ջուղտակ մե ջզմով,
Ձքուրիկ խափեցին մատիկ մե հինով,
Ձփարու հանգուց արձակեցին,
Ձաղջիկ մամուց ջոկեցին³⁴:

Հարսի հինայադրման արարողության մեջ հիմնականում գերակշռում են դանդաղ պարերն և լացերգերը՝ ողբին բնորոշ³⁵: Հարսանեկան ծեսում դա ունի իր բացատրությունը. հինադրեքը այն նշանն է, որը հանդիսանում է սահմանեզր մահվան և նոր կյանքի վերածնման միջև:

Հինան պատրաստում են հատուկ աղոթք ասելով, որին հանդիպում ենք հմայական աղոթքներում: Ահա այն.

Արեգակ չորցուր,
Լուսընակա, կարմրցրու,
Ըոքո, Սըրգո,
Քթիդ արյուն կաթեցուր³⁶ / Քղի /:

Ուշադրություն դարձնելով հինայվող ձեռքին՝ նկատում ենք, որ փեսայի ճկույթ մատը, իսկ հարսի ձեռքի միայն ափն ու եղունգներն էին հինա դրվում: Ձեռքի խորհրդանշական կապը հինայի հետ մի դեպքում մեկնարանվում է որպես տարու, մի այլ դեպքում՝ այն կապ

³³ Վ. Թեմուր ճյան. *Գամիլրքի հայերը*. – ՀԱԲ, հ. 1, Երևան, 1970, էջ 122:

³⁴ Վ. Պետոյան. *Սասնա ազգագրություն*, Երևան, 1965, էջ 242:

³⁵ A. S a y g u n. Bela Bartok's Folk Music Research in Turkey. Budapest, 1976, p. 359.

³⁶ Ս. Հարությունյան. *նշվ. աշխ.*, էջ 164:

ունի այլ երևույթների հետ: Ճկույթն առասպելական իմաստով համարվում է միջնորդ, կապող, հաղորդակցող օղակ տարբեր անձանց (հատկապես տարբեր սեռերի), տարբեր աշխարհների (այս ու այն կողմի կյանքի, մահվան, կենդանիների և մեռածների) միջև և ունի ծիսական նշանակություն³⁷: Ելնելով սույալ փաստերից՝ կարելի է ասել, որ հինայվող ձեռքը խորհրդանշել է ամուսնացող զույգի ոչ միայն անցումային կարգավիճակը (աղջկանից՝ կին, տղայից՝ տղամարդ), այլ նաև՝ սեռական ուժն ու ամրությունը:

Գամիքի Կեմերեկ շրջանում հինադրեքը՝ երկու սեռերի խորհրդավոր և գաղտնի արարողություն էր³⁸: Արարողության վկաներ էին ընտրվում միայն հարսնաքույրն ու ազապբաշին: Դա տեղի էր ունենում շաբաթ կեսգիշերին, բոլորից գաղտնի՝ կանխորոշված վայրում: Նշանված հարսն ու փեսան հանդիպելով՝ առանձնանում էին, ողջագուրվում և հինայված ձեռքերի թաշկինակները արձակելով՝ միմյանց խոստովանում էին իրենց սերը՝ ասելով «էռջի սերս դուն իս: Էռջին եղ որ աչքս պղտոր բանամ, քեզ պղտ որ տեսնամ»³⁹: Կեմերեկի որոշ գյուղերում հարսնացուի լոգանքից հետո էր հինադրեքը կատարվում: Հարսնացուին առաջնորդում էին թոնրի մոտ իրեն հատկացված տեղը, որը լինում էր սովորականից բարձր: Երեք անգամ նստել-կանգնելուց հետո՝ քավորակինը նրա ափի մեջ մի պտղունց օրհնված հինա և մետաղադրամ էր դնում: Այնուհետև տղա երեխաներից մեկը հանում էր ափի միջից դրամը: Այս երևույթը սերտորեն կապվում է սերունդը շարունակելու և բեղմնավոր կյանք ունենալու հավատալիքի հետ:

Հինահանը՝ հարսին հինայից հանելու գործողությունը՝ ոտքերը, ձեռքերը, մագերը լվանալու արարողությունը, կատարվում էր հաջորդ օրը՝ շաբաթ առավոտյան, բուն հարսանյաց հանդեսի օրը:

Ինչպես տեսանք, հինան դրվում էր մագերին, ձեռքերին և ձեռքի եղունգներին, ոտքերին ու ոտքի եղունգներին, որոնք մարմնի վերջույթներն են և ենթակա են զանազան հիվանդությունների, և որոնք հանդիսանում են որպես սահման և պատահական չէ, որ մարմնի կոնկրետ այդ մասերում են կատարվում հմայությունները: Բացի այդ՝ բազմաթիվ հավատալիքներ կապվում են մարմնի վերջույթների հետ⁴⁰:

Հինան հարսանեկան համատեքստում երջանիկ բախտի, սեռական ուժի խորհրդանշան է⁴¹, ինչի վկայությունն են հետևյալ բանաձևերը. «Որը կրհինայէ, որը կրխնայէ» («Մեկին շատ է տրվում, մյուսին՝ քիչ»)⁴², «Ձեռքդ ու ոտքդ դնենք հինա, քեզի կրսենք էլ ու գնա»⁴³:

Ասփոփելով՝ կարելի է ասել, որ հինայի գիշեր արարողությունը հրաժեշտ էր պատանեկան, ազատ կյանքին, դա այն սահմաններն էր, որին անմիջապես հաջորդող

³⁷ Մ. Հ ա թ ո թ յ ո լ ն յ ա ն. Հայ առասպելաբանություն, Բեյրութ, 2000, էջ 306–307:

³⁸ Վ. Թ է մ ո լ ը ճ յ ա ն. նշվ. աշխ., էջ 122:

³⁹ Նույն տեղում, էջ 121–122:

⁴⁰ Ջ. Ֆրեգեր. Ոսկե ճյուղը, Երևան, 1989, էջ 278–284:

⁴¹ Կ. Գ ա բ ի կ յ ա ն. Բառագիրք սեբաստահայ գավառալեզվի, Երուսաղեմ, 1952, էջ 341, Մ տ. Մ ա լ ի ս ա յ յ ա ն. Հայերեն բացատրական բառարան, հ. III, Երևան, 1944, էջ 107, Հր. Ա ճ ա ո յ ա ն. Հայերեն գավառական բառարան, Թիֆլիս, 1913, էջ 658–659:

⁴² Կ. Գ ա բ ի կ յ ա ն. նշվ. աշխ., էջ 620:

⁴³ Նույն տեղում, էջ 341:

օրը սկսվելու էր նոր կյանքի շրջափուլ մտնելու ընթացքը: Ըստ Սրբ. Լիսիցյանի՝ հինադրեքը նախնական ծեսի վերապրուկ է, երիտասարդ աղջիկներն ու տղաները հինայել են իրենց մարմնի որոշ մասերը նախաամուսնական արարողություններում, ինչը կրել է իր մեջ երիտասարդ կյանքի և սեռական ուժի հավատալիքը⁴⁴:

Հարսանիքից առաջ՝ ուրբաթ օրվա գիշերը, հավաքվելու արարողությունն այսօր էլ շարունակում է կատարվել Հայաստանի շրջաններում, բայց այն տարբերությամբ, որ հինադնելը դուրս է մղվել բուն արարողակարգից:

СИМВОЛИКА ОБРЯДА НАЛОЖЕНИЯ ХНЫ В СВАДЕБНОМ ЦИКЛЕ АРМЯН

НАРИНЕ ШАМАМЯН

Резюме

В армянском свадебном цикле день наложения хны четко определен. Во всех этнопровинциях этот день приходится на ночь пятницы, но иногда бывают исключения. Весь процесс наложения хны сопровождается торжественными зрелищами, неотделимой частью которых являются сольные пляски, песни и шествия. Церемония проводилась в первую очередь в доме жениха, а затем дома у невесты.

THE SYMBOLICS OF HENNA RITUAL IN THE WEDDING CYCLE OF ARMENIANS

NARINE SHAMAMYAN

Summary

Henna ceremony day is clearly fixed within Armenian wedding cycle. In all Armenian ethnoprovinces this ritual is organized on Friday night; but sometimes there can be exceptions. The whole process of Henna ceremony is accompanied by ceremonial performances, which include sacral dances and songs. First of all, the ceremony is held in bridegroom's house and after in bride's house.

⁴⁴ Տրբ. Լիսիցյան. Նշվ. աշխ., էջ 180: